


Giachen Hendry-Cavegn

Sedrun/Tujetsch



L.J. Nies Salvador e Spindrader cloma siu fideivel survient Giachen Hendry-Cavegn suenter liunga e lungurusa malsogna alla gloria celestia. El ei morts ils 12 da decembre 1988 el spital a Glion bein tgiraus da miedis e soras. Sia mort ha consterniu ses parents, amitgs e convischins. Cun la mort da nies emprem canzlist tuatschin ei ina veta cumplenida ida da rendiu, mo ils fastitgs ed ils fretgs vegnan a restar.

Fegl d'ina gronda famiglia

Il defunct Giachen Hendry-Cavegn ei naschiussi ils 27 da decembre 1914 a Sedrun/Gonda cuort suenter l'erupziun dall'emprema uiara mundiala. Ses cars e buns geniturs Gion Antoni Aluis Hendry e Maria Lucia, nata Soliva, han giu enorm plascher dils schumellins Giachen e Turtè e franc festivau solemnamein il ventireivel eveniment. Otg affons ha la famiglia ed igl ei en temps d'uiara nuota aschi lev da cuscentar tontas buccas plein fom. Siu bab, numnaus il Luis calger, ha mussau ad uras da luvrar e sedustar. S'entelli, da lezzas uras fagevan ins buca grondas pretensiuns. Malgrad ch'il defunct Giachen ha piars baul sia mumma, passenta el ina biala affonza. El ei adina staus inschignus e movibels. «In buob che sa se stellegiar», scheva scolast Sep Mudest Nay.

Siu maletg, sia giuentetgna e famiglia
Avon mei stat sia fotografia cuort suenter sia pensiun. Quella tradescha igl um plein voluntad, d'ina egliada spirtala e franca e plein buontad, d'ina statura nobla e d'in sedepurtar franc e segir.

Siu bab ha giu il dètg plascher, cura ch'il Giachen ei sedecidius da vegnir

calger e schizun d'absolver igl empredissadi tier el. Quel ha el fatg cun bien success e pli tard luvrau a pèr cun siu bab. Els fagevan oreifer calzers. Igl onn 1941 ei siu bab morts. Lu ha siu fegl Giachen surpriu la fatschenta e menau quella entochen 1959.

Il defunct Giachen ha era patertgau a siu avegnir e planisau sia veta terrestre. Igl onn 1939 baghégia el casa e spusa la giuvna Mariuschla Cavegn. La lètg vegn benedida cun treis affons: duas dunschallas ed in stupent mattatsch. Igl onn 1980 miera sia dunna e ses affons muntan la legria e cumplenida da sia veta.

Veta publica ed activitatad politica

Tgirar la cultura ei in act ni in fatg da noblezia è dat perdetga d'in niebel sentir e patertgar. Senza cultura mass nies mund a smerscha. L'activitatad publica dil defunct Giachen ha entschiet gia'en giuvens onns. Sco mat ed um giuven fa el part dallas uniuns culturalas e sportivas. Malgrad il prezios quitaui per sia cara famiglia, ha el adina cattau temps e plascher per survir alla publicidad. In tschuppel onns camonda el il corps da pumpiers. Nus entupein il defunct era el cussegli d'administraziun dalla Banca Raiffeisen e dils Runals. Dapertut eis el activs, plein iniziativa e presta lavur cumpleina.

Ils vischins da Tujetsch han beinspert scuvretg ils duns, ils talents e las qualitads dil defunct. Els san appreziar sias habilitads e respectan siu caracter gest e ferm. Interess per fatgs publics ha il defunct Giachen demussau da giuven ensi. Ils 18 da matg 1959 han ils umens da vischnaunca elegiu Giachen Hendry sco gerau-cassier. Cun plascher, slontsch ed entusiassem ha el surpriu quei uffeci. El ademplescha la scharsha cun gronda exactedad e distincziun. El vegn schau stgisar gnanc la minima caussa. Lavur entira ei sia devisa. Pertscharts ch'il defunct Giachen fageva tut aschi stupent, han ins surdaud ad el in buordi suenter l'auter: la controlla da habitants, igl onn 1966 igl uffeci civil e 1971 la cassa da compensaziun. Muort l'accumulaziun da lavur ha il Giachen stiu calar cul mistregn e sededicar totalmein alla incumbensa publica.

La conjunctura serefia pli e pli. Il trafic da daners crescha scosauda ed il menaschi communal medemamein. Igl 1. da zercladur 1961 elegia la vischnaunca Giachen Hendry sco emprem canzlist communal, sco emprem emploiau d'administraziun stabel. Quei post impurtont ha el administratu entochen alla fin digl onn 1979, entochen sia pensiun. Onns ed onns entochen l'avertura dalla «Tgesa communal» 1974 ha il canzlist

liquidaui tut quella lavur publica a casia en semplas localitads.

Pli tard ei l'administraziun carschida en Tujetsch. Ei ha duvrau ulteriuras forzas da lavur. Il defunct ei denton restaus il directur e l'olma dils emploiai d'administraziun. Cun maun ferm te neva el ils freins entamaun, procurond che tut seigi en uorden ed en rama, principalmein las finanzas. Quei ei stau d'engrau e quietond per las autoritads e per ils vischins da vischnaunca.

Suenter la pensiun

Suenter la pensiun stat il Giachen buca mauns a calun. Bein vegn el mulestaus d'ina diabetes che pretenda dieta continuada. Adina puspei vegn el duman daus per plaid e cussegl. Dasperas fa el di per di enqual spassegiada sur vias e sendas cun ses affons ni beadis ni magari era cun amitgs. El gauda la bellezia dalla natira en sia cara Val Tujetsch. Savens serenda el tier siu fegl a Cuera e passenta enzacons dis da vacanzas. Meinswart banduna el la Val e serenda a Stans tier sia feglia pintga. Leu pren el la caschun da visitar la patria da nies patrun dalla Svizra: sogn Clau da Flia. Ils affons han propri fatg bien cul bab. Oravontut sia feglia Lucia ha adina giu bien quitaui dil bab e mereta in tut special engraziament.

Vonzei surprendan ils mals il tgamun. Il defunct Giachen giavischia da vegnir hospitalisaus ella Casa Sontgacieu a Curaglia. Igl asil s. Vigeli a Sedrun sesanfla onz damaneivel da sia casa paterna. Pli tard entupein nus il Giachen egl asil da sogn Martin a Trun, nua ch'el vegn tgiraus cun gronda premura e carezia. Mo las forzas svaneschan, la memoria disdescha ed el sto serender el spital a Glion – per murir.

La porta finala

Arrivada l'ura finala, dat ei buc in ier, in ozed in damaun, buc in far prescha e buc in spitgar. Il cuors dalla veta para lu sc'in punct senza entschatta e senza fin. Gie franc, lu quentan mo las bunas ovras e quellas ha il defunct Giachen da mussar biaras a siu Scuffider e Spindrader. El ei staus in um da profunda caridentscha e da bien exempl. Biars concärstgauns e vischins han accumpaignau el sin siu davos viadi. Survetschs da buontad emblidan ins mai. Els fuorman ils pli bials tschupials agl ur dalla fossa da quel che ha prestau els.

Segner, lai reger Tia buontad e misericordia e paga sias stentas e sia premura cun la legria celestia. Allas famiglias en malencurada exprimin nus sincera condolentscha. Buca seigies trests, il defunct ha battiu in bien cumbat.